

BOSANSKOPETROVAČKI VJESNIK

Mjesečnik Općine Bosanski Petrovac



Glas Načelnika

O predstavničkom sistemu!

Dragi sugrađani,

Znam da vam ovaj naslov ne kaže ništa zanimljivo, ali znam i da vas se i te kako tiče, u svakodnevnom životu...

Svaki izborni sistem, pa i ovaj naš, u BiH, sastoji se od predstavničkih slojeva: od temelja, tj. od građanina-birača i njihove osnovne izborne jedinice, do najviše zakonodavne skupštine. Šta se to tiče jednog čitaoca našeg lista? Tiče ga se, jer naš čitalac-sugrađanin nema svog predstavnika niti u jednom od predstavničkih slojeva: niti u skupštini Unsko-Sanskog kantona, niti u Federaciji BiH, niti u Predstavničkom, niti u Domu naroda Skupštine BiH?

Koga nema u tijelima koja narod izabere, nema ga ni u vlasti koju postavljaju narodni izabranici. Tako je naša Općina, u bh. predstavničkom izbornom sistemu, svedena na samu sebe: niko je ne zastupa u organima u kojima se odlučuje o životnim pitanjima građana i geopolitičkog prostora u kojem i od kojeg žive! A da imamo makar jednog predstavnika/zastupnika našeg grada – on bi predstavljao interese svakog od nas tamo gdje se o nama odlučuje!

Ali, pošto ga nemamo, jedno, a drugo, pošto je Statutom Općine propisano da „Načelnik, kao nosilac izvršnih poslova u okviru samoupravnog djelokruga Općine/Opštine (...) predstavlja i zastupa Općinu/Opštinu“ – eto Načelnika u predstavničkom/zastupničkom sistemu BiH! ...Jest, eto ga, samo ako se hoće predano odnositi prema ovoj statutoj obavezi!

Sad smo došli na ono što vas se tiče: kako izvršavam ove „poslaničke“ obaveze? Nije, zaista, lako obavljati svakodnevne načelničke dužnosti i, u isto vrijeme, predstavljati interese naših građana u zakonodavnim organima od Bihaća do Sarajeva ili, što je još teže, u vlastima koje neposredno odlučuju o našoj svakodnevnicima!

Ja „letam“ koliko mogu. Ne znam ima li me više u našem gradu, ili za volanom, ili po sastancima raznih organa u BiH, ili po kancelarijama onih koji nam mogu pomoći, ako hoće. A hoće, uvjerio sam se bezbroj puta, samo ako se obratimo na pravu adresu! Valjalo mi je za ove tri godine načelnikovanja kucati i otvarati jedna po jedna vrata...

Nekidan otvorim još jedna, gdje saznam da još od 31. decembra 2005. postoji „Sporazum o ponovnom priključenju stambenih objekata na elektrodisistribucijsku mrežu u BiH“, u kojem piše: „Elektropreduzeća neće naplaćivati nikakve takse za ponovnu prijavu priključenja prijeratnog objekta.“, ili „Elektropreduzeća neće naplaćivati bilo kakve troškove priključenja stambenog objekta povratnika...“!!!

Znači, dragi sugrađani-povratnici, nema više plaćanja za uvođenje struje! Ko je platio – platio je! Međutim, to ne znači da Općina nije dužna, u granicama zakonskih mogućnosti, iznalaziti neko obeštećenje za dosadašnje slučajeve.

I tako, kucajući i otvarajući jedna po jedna vrata, od jednog do drugog mogućeg sponzora ili poslovnog investitora, obnovi se i izgradi puno toga u našem Petrovcu: kanalizacija, vodovod, javna rasvjeta, elektrifikacija sela, asfaltiranje, stambene i poslovne zgrade, fabrike, poljoprivredna dobra... U narednim brojevima ćemo objaviti sve ove projekte, koji su nam život učinili boljim.

Nastavit ćemo vas, dragi moji Petrovčani, i dalje informisati o našem radu i planovima. Vaše je pravo, a naša dužnost, da vam polažemo račune!

Srdačno,

Zlatko Hujčić

Slušajte Radio Bosanski Petrovac od 15:00-17:00, svakim danom na 90.9 MHz fm

Dostojanstveno obilježen Dan Općine

Povodom Dana Općine, 25. maja, upriličen je bogat i svečan program obilježavanja... Najprije su se, pred zgradom Općine, okupili predstavnici političkog, javnog i kulturnog života grada, kao i predstavnici kantonalne vlasti i susjednih općina Unsko-sanskog kantona.

Potom je započelo polaganje cvijeća. Polaganje cvijeća i odavanje počasti borcima, šehidima i civilnim žrtvama proteklih ratova obavljeno je, najprije, na Trgu šehida, potom ispred zgrade Općine, pa kod Spomen-biblioteke Skender Kulenović, na partizanskom groblju i u mjesnim zajednicama.

Nakon polaganja cvijeća, u prepunoj Vijećnici održana je svečana sjednica Općinskog vijeća uz brojne, nama drage i uvijek dobrodošle goste. Predsjedavajuća Općinskog vijeća, Bobana Velaga, otvorila je sjednicu prigodnim govorom, u kojem je istakla da sve političke i lične interese treba podrediti interesu našeg grada, te da zajedničkim snagama treba raditi na tome da se u njemu stvore bolji uslovi za život. U daljem izlaganju istakla je prirodne ljepote Općine, kao značajan resurs, ali isto tako navela je i da su ljudi resurs koji ne smije biti zanemaren.

Potom se prisutnima obratio i prvi čovjek Općine, načelnik Zlatko Hujčić. Pozdravivši goste, zaželio im je ugodne trenutke u našoj sredini, te u svom izlaganju naveo neke od do sada realizovanih projekata. Istakao je najnovije investicione projekte, koji će doprinijeti da se tokom ove godine zaposle deseci naših sugrađana: preduzeće Arifagić Investment je kupilo fabriku „Fana Zas“, u Krnjeuši, u kojoj planira proizvoditi stočnu hranu, a „Bingo“, bh. lanac supermarketa, uveliko radi na adaptaciji radnog prostora bivšeg „Noviteta“ gdje će biti smješteni supermarket „Bingo“ i proizvodni pogon „Alma Ras“. Dolaskom ova tri jaka investitora, i uz već prisutne domaće ulagače, razvija se stočarstvo, proizvodnja, trgovina, kultura, što su glavne stavke boljeg prosperiteta naše Općine.

Ovom prilikom dodijeljene su i zahvalnice u ime građana naše Općine:

Sandiju Terziću, za doprinos u oblasti zapošljavanja stanovništva, poboljšanja privrednog ambijenta, izgradnji privrednih kapaciteta i poboljšanju života građana

Marinku Mrđi, za doprinos i rad na povratku stanovništva, rad za opće dobro stanovništva MZ Smoljana i pomoći ljudima u stanju socijalne potrebe

Elektro-uslužnom trgovačkom preduzeću MIG Elektro doo Mrkonjić Grad, zbog dobre poslovne saradnje na realizaciji projekta

javne rasvjete, profesionalnosti i uspješnu dugogodišnju saradnju

Azemi Avdušinović, projekt menadžeru u „Hilfswerk Austrija“, za doprinos na izgradnji objekata za stanovanje povratnika, izbjeglih i raseljenih lica kao i lica u socijalnoj potrebi

Adisa Bolić je dobila Plaketu Općine, za izuzetne zasluge u promociji našeg grada kroz učešća u takmičenjima u matematici širom BiH i u svijetu, na kojima je ostvarila rezultate za koje se dobijaju najviša priznanja

Pored mnogobrojnih gostiju, svečanoj sjednici OV su prisustvovali premijer

USK Izudin Saračević, sa savjetnikom Jasminom Musićem, načelnik općine Bužim Agan Bunić, savjetnik načelnika općine Cazin Jusuf Bajraktarević, načelnik Sektora kriminalističke policije MUP USK Šero Družić, predstavnici političkog, javnog, kulturnog i vjerskog života grada i dr.

Svečanosti posvećene Danu Općine nastavljene su uveče, u Domu kulture, otvaranjem izložbe fotografija kulturno-historijskih spomenika na području Općine i prigodnim kulturno-umjetničkim programom. Natupali su najmlađi i najslađi, mališani Dječijeg vrtića, učenici osnovne i srednje škole, kao i učenici petrovačkog odjeljenja Umjetničke škole Bihać.

Foto-reporterski izvještaj o Danu Općine



Delegacija Općine Cvijevce polaže cvijeće na spomenik na Trgu šehida



Marinko Mrđa



Najmlađi i najslađi, mališani Dječijeg vrtića



Svečanoj sjednici su prisustvovali brojni gosti: prvi s lijeva premijer Izudin Saračević, načelnik Bužima Agan Bunić, savjetnik načelnika Cazina Jusuf Bajraktarević i savjetnik premijera Jasmin Musić



Adisa Bolić



Učenici osnovne škole u izvođenju tačke Kolaž



Zahvalnice su uručili načelnik Zlatko Hujić, predsjedavajuća OV Bobana Velaga i zamjenik predsjedavajućeg OV Haris Mešić: Prvi dobitnik Sandi Terzić...



Nastavak svečanosti u Domu kulture



„Ko želi da ovo prestane, neka ustane!“

Plodotvoran i efikasan rad Vijeća

Redovna 40. sjednica Općinskog vijeća održana je u četvrtak, 26. maja. Nakon usvajanja Izvoda iz Zapisnika sa prvog dijela i nastavka 39. redovne, te dviju vanrednih sjednica, osme i devete, uslijedila su vijećnička pitanja i odgovori, nakon čega je uz određene izmjene i dopune usvojen dnevni red od jedanaest tačaka.

Vijećnici su usvojili Izvještaj Komisije za pregled radova urađenih na kompletnoj kanalizacionoj mreži, koji je podnio i obrazložio Sead Badnjević, njen predsjednik. Konstatovano je da prilikom izvođenja radova nije došlo do značajnih izmjena u odnosu na projektnu dokumentaciju. Komisija ustanovila da je investitor obezbijedio potrebne dokaze o kvalitetu ugrađenog materijala i izvedenih radova. Predsjednik Komisije je istakao i da je nakon pregleda sve dokumentacije utvrđeno da su radovi u skladu sa izdatim rješenjem o odobrenju za građenje, važećim zakonskim propisima, standardima, tehničkim normama, kao i pravilima struke, što su svojim potpisima

potvrdili članovi Nadzornog organa i PMU tima.

Informacija o izvršenju budžeta općine za prvo tromjesečje i Informacija u vezi preraspodijele budžeta za 2016. godinu primljene su k znanju. Za prvi kvartal realizirano je 1.129.938 KM, tj. 24%, što je manje za simboličnih 1% u odnosu na godišnji plan.

U konstruktivnoj raspravi vijećnika, usmjerenu na povećanje opreza građana, usvojena je Analiza stanja sa aspekta protivpožarne zaštite u preduzećima, samostalnim trgovinskim, ugostiteljskim i uslužnim radnjama.

Skinuta sa dnevnog reda Informacija o preduzimanju radnji za rješavanje problema pasa lualica, uz sugestiju vijećnika da se materijal dopuni prijedlozima mjera za rješavanje ovog problema.

Na kraju sjednice usvojena je Odluka o usvajanju izmjene općinskog Urbanističkog plana 2007-27. godina, kao i Regulacioni plan poslovne zone Gorinčani.



Sa 40. redovne sjednice Općinskog vijeća

Arifagić već proširuje proizvodni prostor

Potpisivanjem ugovora o prodaji, krnjeuška „Fana- Zas“ prerasla u „Fana-Arifagić“ doo Bosanski Petrovac

Nakon nekoliko mjeseci intenzivnih pregovora, u Prijedoru je 23. maja potpisan ugovor o prodaji bivšeg drvoprerađivačkog preduzeća „Fana Zas“ iz Krnjeuše firmi „Arifagić Investment.“ Ovim ugovorom je firma poznatog kozaračkog poduzetnika Jusufa Arifagića postala vlasnica hala i zemljišta, gdje se planira otvaranje pogona za proizvodnju koncentrovane stočne hrane, kao i farme za uzgoj prvoklasnih bikova i rasplodnih junica za potrebe bh. tržišta i okolnih zemalja.

Zaključivanju ugovora, koji su potpisali vlasnici firmi Jusuf Arifagić i Zlatan Mujadžić, prisustvovao je i načelnik Zlatko Hujić, uz čije posredovanje i inicijativu tokom zadnjih mjeseci je i došlo do ove transakcije, na zadovoljstvo obje firme i, najviše, u interesu stanovnika-povratnika u mjesnoj zajednici Krnjeuša. Prije kupovine 10.000 kvadrata ove hale i 34 duluma zemljišta u vlasništvu firme „Fana Zas“, firma „Arifagić Investment“ je dobila u zakup 81 hektar zemljišta na Oraškom brdu i Prkosima, koji će služiti za potrebe buduće farme i proizvodnju stočne hrane.

Prilikom potpisivanja ugovora, Arifagić je najavio pokretanje proizvodnje stočne hrane u Krnjeuši u najskorijem roku, te istakao da će oko 300 grla norveškog crvenog govečeta, koje za sada uzgaja na svojoj farmi u Trnopolju, biti premješteno u Krnjeušu već do kraja juna. Osim toga, Arifagić se zahvalio i

općinskoj administraciji na svesrdnoj pomoći u dosadašnjem toku njegovih investicija u Bosanski Petrovac: „Općinska administracija je radila na principima zapada, vrlo brzo i efikasno, ovo je sigurno jedan veliki dan za općinu i ja ću sa svoje strane sigurno ispuniti sve ono što sam obećao, jer je to, naravno, i u mom vlastitom interesu.“

Načelnik Hujić je pozdravio potpisivanje ugovora kao jako važan događaj za našu općinu i kanton. „Ovo je kapitalizacija naših napora koji su trajali otprilike jednu godinu“ – rekao je Hujić i naglasio kako su nedavne investicije firme „Arifagić Investment“ u Bosanski Petrovac i Bosansku Krupu od ključne važnosti za poljoprivredu u Krajini, čija polja su predugo bila pusta.

Vrijedi istaći da je u projekte firme „Arifagić Investment“ u BiH do sad uloženo oko 15 miliona KM i da njen rad prate i podržavaju institucije Kraljevine Norveške, kao i naučnici iz stočarske grupacije „GENO Global“. Načelnik Hujić je prilikom nedavnog sastanka sa gospodinom Arifagićem i norveškom ambasadoricom gospođom Vibeke Lilloe dobio čvrste garancije, da će tako biti i u projektima u našoj općini. Tom prilikom je norveška ambasadorica u BiH obećala da će sa predstavnicima kompanije „GENO Global“ posjetiti Bosanski Petrovac i prisustvovati činu primopredaje objekata buduće farme.



Zlatan Mujadžić, desno i Jusuf Arifagić potpisuju ugovor



S desna: poduzetnik Jusuf Arifagić, ambasadorica Vibeke Lilloe, petrovački načelnik Zlatko Hujić i njegov krupski kolega Armin Halitović

„Novitet“ ubrzano oživljava...

Vlasnici firmi „Bingo“ i „Alma Ras“, u pratnji Načelnika i Premijera, obišli oronuli prostor „Noviteta“ koji se ubrzano sprema za novi radni život

Senad Džambić, vlasnik trgovačkog lanca „Bingo“ i Đemal Memagić, vlasnik tekstilne industrije „Alma Ras“ obišli su 24. maja nekadašnju tvornicu „Novitet“, u kojoj se upravo izvode građevinski radovi u cilju adaptacije prostora za otvaranje „Bingovog“ supermarketa i pokretanja proizvodnje rublja „Alma Ras“. Ovom prilikom održan je i sastanak sa najvišim predstavnicima vlasti Općine i Kantona, Zlatkom Hujićem i Izudinom Saračevićem. Iskazano je zadovoljstvom kako napredovanjem radova tako i činjenicom da su dvojica od vodećih bh biznismena pronašli upravo u našem gradu dobru mogućnost za proširenje svojih poslovnih planova.

Iz razgovora sa gospodinom Džambićem, koji nerado daje intervju i izjave za javnost, doznali smo kako se okončanje svih radova očekuje tokom ljeta, i da se otvaranje supermarketa može očekivati najdalje do kraja avgusta. Prema Džambićevim riječima, „Bingo“ će u Petrovcu zaposliti najmanje 50 radnika. Osim supermarketa, koji će zauzimati oko 2,5 duluma, tu će biti i restoran, te igraonica za djecu. Vlasnik „Binga“ je istakao kako su neke stvari u rekonstrukciji „Noviteta“ bile zahtjevnije i teže nego što je bilo očekivano, ali da je uvjeren u uspješnost ove investicije.

„Alma Ras“, kao renomirani proizvođač i izvoznik visokokvalitetnih tekstilnih proizvoda sa stotinama radnika koje upošljava u svojim pogonima u Olovu i Visokom, nastavlja tradiciju izvrsnosti u proizvodnji tekstila koju je imao nekadašnji „Novitet“. Vlasnik firme g. Memagić, koji je i načelnik općine Olovo, rekao nam je kako će broj radnih mjesta u novom pogonu najviše zavisiti od dostupne radne snage. Vjeruje da ovdje ima stručnih radnika, s obzirom na višedecenijsku petrovačku tradiciju u proizvodnji tekstila. Memagić očekuje da će „Alma Ras“ zaposliti mnoge

radnice nekadašnjeg „Noviteta“, čije će iskustvo doprinijeti uspješnom početku rada pogona, što se najkasnije može očekivati početkom jeseni.

Načelnik Hujić istinski je oduševljen planovima koje su iskazali biznismeni Džambić i Memagić. Priznajući emotivnu vrijednost koju doživljava oživljavanje nekadašnjeg „Noviteta“ kaže:

„Ovo je kruna nečeg na čemu sam radio otkako sam postao načelnik! Moja satisfakcija je da vidim da se vraća trud uloženi u pronalaženje investitora za naša uništena preduzeća. Za mene će najveća nagrada biti kad budem slušao skladni takt šivaćih mašina u „Novitetu“, onako kako je u njihovoj harmoniji uživao moj otac Hemko, davne 1972., kao osnivač i višegodišnji direktor „Noviteta“!

Premijer Saračević je istakao kako je Petrovac primjer sredine koja vlastitim naporima pokušava stvoriti pozitivan ambijent i kako uzorni rad lokalne administracije mora biti prepoznat i cijenjen.

„Moje prisustvo na ovom mjestu danas pokazuje moju posvećenost razvoju svih sredina na Kantonu i podršku gospodi Džambiću i Memagiću u njihovim firmama, čiji dolazak u neke druge sredine predstavlja tek misaonu imenicu“ – slikovito je naglasio premijer.

Hujić se i ovom prigodom zahvalio premijeru Saračeviću na stalnom interesovanju za naš grad i saradnjom kakvu ova općina nije imala ni sa jednim premijerom prije njega.

Evo još pokoji podatak o ovim dvjema velikim firmama, koje će ubuduće biti i petrovačke:

„Bingo doo export import“ je firma za trgovinu na malo, osnovana 1993. godine u Tuzli. Otada je proširila mrežu trgovina širom

BiH, tako da sada broji više od 160 poslovnih jedinica. Osim kvaliteta usluga i širokog asortimana, „Bingo“ omogućava i najniže cijene, pod istinitim, lako provjerljivim sloganom „Bingo, kralj dobrih cijena!“. U ponudi su proizvodi prehrane, hemije, kozmetike, konfekcije, kućnih potrepština, a na raspolaganju su i dobro opremljene igraonice, baby centri i restorani sa najnižim cijenama u regiji. Uključujući se u trajnu akciju „Kupujmo i koristimo domaće“, u „Bingu“ je zastupljenost domaćih proizvoda i iznad 70% u nekim kategorijama.

„Alma Ras“ je osnovana na Dan žena 1998. godine i od tada slovi za nezaobilazno mjesto ljubitelja kvalitetnog finog ženskog i muškog donjeg rublja i spavaćeg programa. Od male, porodične radionice u Olovu, izrasla je u jedna od najpoznatijih firmi u BiH, i šire. Veća potražnja iziskuje i dodatne proizvodne kapacitete te je, pored postojećih pogona u Olovu, Varešu i Srebrenici otvoren još jedan, u Visokom, 2014. godine. Te godine prošireno je poslovanje na Srbiju (otvoren butik u Beogradu), a izvozna mreža pokriva Crnu Goru, Makedoniju, Norvešku i Južnu Koreju.



Vlasnici kompanija „Bingo“ (treći s lijeva) i „Alma Ras“ (četvrti s lijeva), te premijer Saračević (prvi s desna) i načelnik Hujić (drugi s desna) u budućem novom „Novitetu“

Još 40.000 KM od USK za vodovod

Samir Sedić, ministar Ministarstva poljoprivrede, vodoprivrede i šumarstva USK-a i Zlatko Hujić, općinski načelnik potpisali su u Bijaču, 31. maja, 2016. Ugovor o pravima i obavezama u realizaciji II faze projekta „Rekonstrukcija i izgradnja gradske vodovodne mreže Bosanski Petrovac u 2016. godini“. Ministarstvo će po ovom ugovoru učestvovati sa 40.000 KM, a rok za završetak ugovorenih poslova je početak septembra, tj. 150 dana računajući od dana potpisivanja ugovora.

Projekt obuhvata:

- Izgradnju distributivnog cjevovoda promjera 160 m u dužini 539,52 m, sa pripadajućim čvorovima
- Izgradnju sekundarne mreže u dužini 218,53 m, sa 15 kućnih priključaka
- Vodovodno oko sa opremom-zonski mjerač 150 mm, prema poslovnoj zoni Gorinčani
- Priključke-odvoj za tvornicu „Bosna-plast“ i glavni trafo „Elektroprenos“.



Međusobne čestitke po potpisivanju ugovora: ministar Sedić i načelnik Hujić

Racionalno iskoristiti preostalo vrijeme

Prvi sastanak Radne grupe za provođenje projekta „PRO-Budućnost“

Prvi sastanak općinske Radne grupe za provođenje projekta PRO-Budućnost održan je 17. maja, u prisustvu predstavnika CRS (Catholic Relief Services; doslovno prevedeno: Katoličke dobrotvorne usluge) i Caritasa, koji uz podršku Američke agencije za međunarodni razvoj (USAID) organizuju projekt u 30 gradova širom BiH.

Nakon predstavljanja projekta i projektnih partnera, prisutni su se upoznali sa Pravilnikom o radu Radne

grupe, sa planom rada i dobili odgovore na pitanja koja su postavljali. Prostalo je zasukati rukave i krenuti na posao!

Cilj projekta PRO-Budućnost je izgradnja povjerenja među građanima BiH, dobro pomećenog ratom 1992-95. Namijenjen je žrtvama rata, ženama, mladima, a provodiće se putem formalnih i neformalnih grupa civilnog društva, vjerskih zajednica, vijeća nastavnika i roditelja... PRO-Budućnost će raditi sa građankama i građanima na način

da razumiju postojanje različitih opisa političkih i istorijskih priča i da ohrabre ključne uticajne aktere da podrže sve inicijative usmjerene ka pomirenju.

Više puta je pomenuto, kako postoji veliki potencijal u našoj Općini za realizaciju ovog projekta. Članovi grupe su izrazili žaljenje, što se nije ranije otpočelo sa provođenjem projekta, i izrazili spremnost da daju maksimum, kako bi se što uspješnije iskoristilo vrijeme koje je preostalo za ostvarivanje projekta.

Godišnji defile maturanata

Parada mladosti i ljepote petrovačkim ulicama...

Učenici završnih razreda MSŠ „Bosanski Petrovac“, njih 59, svečano su 21. maja obilježili kraj srednjoškolskog školovanja. Nakon okupljanja pred školom, te zajedničkog fotografiranja s roditeljima i prijateljima, maturanti su svečanost počeli u školskoj sali, gdje su predstavljani svi pojedinačno, i gdje su otplesali valcer, pred mnogobrojnom publikom.

Tu ih je pozdravila direktorica Škole, Besima Kišljen, ističući da je ponosna na ovu generaciju koja se istakla uspjehom, te im je čestitala i poželjela sreću u daljem školovanju ili zapošljavanju. Odatle su se, u „stroju“, uputili na neizostavni defile po gradu, gdje su ih aplauzom pozdravili brojni sugrađani.

Matursko „slavlje zrelosti“ nastavili u hotelu „Silver“. Oni su večeras učinili ljepšim naš grad:

Gimnazijalci: Anita Ahmetagić, Amela Bašić, Milica Bursać, Nirvana Ferizović,

Eldina Hadžić, Sabiha Hajder, Ismar Ibrišević, Isnam Jukić, Azra Kavaz, Danijela Latinović, Marko Latinović, Milica Latinović, Ajla Linić, Hanna Mahmutspahić, Mujo Mašić, Nataša Mrđa, Emin Muhić.

Šumarski tehničari: Edvin Družić, Jasmin Družić, Boris Grahovac, Vojislav Grubiša, Zekija Halilić, Samra Hidić, Amar Hujčić, Adis Jašarević, Bojana Jeličić, Dragan Kecman, Haris Klokić, Zoran Kovačević, Sanja Mrđa, Arijana Mujagić, Adisa Palić, Atif Ramić, Sanja Santrač, Milena Stojanović, Ranko Šarac, Nikola Vranješ.

Bravari: Adnan Bolić, Hajrudin Bratus, Harun Ibrašimović, Nikola Kalanj, Miloš Manojlović, Adnan Mešić, Dženan Mešić, Rijad Omić, Boris Stojanović, Smajo Velagić

Frizer- vlasuljar: Meliha Bajrektarević, Vuk Čigoja, Adis Bolić, Aldin Hadžić, Haris Ibrašimović, Darko Inđić, Nikolina Jeličić, Muhamed Kahrić, Alma Mehić, Anel Spahić, Dejan Srđić, Dragana Vojinović



Maturantski valcer u sportskoj dvorani



Ovo je garancija bh. kvaliteta!

Kupujmo domaće!

učenici MŠC priredili promociju bh. proizvoda, priključujući se poruci sa Foruma u Banjaluci, da „samo tako možemo pomoći i unaprijediti prosperitet Bosne i Hercegovine“!

Učenici MŠC „Bosanski Petrovac“ priredili su, 18. maja, na Gradskom trgu, promociju domaćih proizvoda iz asortimana AS Grupacije (ASG), čime su dali svoj doprinos širenju sveobuhvatne akcije „Kupujmo i koristimo domaće“, koja se u našoj zemlji organizovano vodi od 2005. godine, i u koju je uključeno više od 500 bh. kompanija.

Među ovim kompanijama je i ASG (www.asgroup.ba), jedna od najvećih bosanskohercegovačkih grupacija sa većinskim privatnim kapitalom, koju sačinjavaju, među ostalima, industrija prehrambenih proizvoda „Vispak“ iz Visokog, kompanija za proizvodnju mineralne vode „Oaza“, kompanija za preradu i proizvodnju proizvoda na bazi žitarica „Klas“ i industrija prehrambenih

proizvoda „Sprind“, obje iz Sarajeva, Mlin i Pekara Ljubače iz Tuzle i dr.

Samo u prehrambenoj industriji, u ASG se proizvodi oko 1.200 različitih proizvoda, koje ukrašava prepoznatljiva zvijezda – garant domaćeg, čistog bh. proizvoda. Među tim proizvodima su i Zlatna džezva, Begova čorba, Jufka, Stampi krem štapići, Bosanski lokum itd.

Upravo ovaj lokum nudili su posjetiocima za degustaciju članovi MŠC Ajla Hidić, Đejlana Mehić, Danilo Kecman i Dragan Kerkez, koji su na svom štandu predstavili brojne proizvode „Klasa“. Postoji dobar razlog zbog kojeg se MŠC opredijelio da predstavi upravo ovog člana ASG:

„Bosanskohercegovačka prehrambena industrija Klas d.d. Sarajevo proglašena je na Sarajevo Business Forumu za „Business godine“ u regiji. Priznanje koje se prvi

put dodjeljuje jednoj kompaniji danas je uručeno direktoru Klasa Rusmiru Hrviću...“

Vrijedno je pomena, da se MŠC uključio u ove aktivnosti samo pet dana po održavanju četvrtog „Foruma o domaćoj proizvodnji“, čiji je domaćin bila Banjaluka. Učesnici Foruma pozvali su domaće proizvođače da posebnu pažnju poklone kvaliteti, a građane da kupuju domaće proizvode, jer „samo tako možemo

pomoći i unaprijediti prosperitet Bosne i Hercegovine“!

Ove godišnje forume redovito organizuje Međunarodni univerzitet „Burč“ (www.ibu.edu.ba/bs), čije je sjedište na Ilidži. „Burč“ je član porodice privatnih „Bosna Sema“ obrazovnih institucija, od osnovne škole, preko koledža do univerziteta u gradovima u Tuzli, Bihaću, Zenici, Sarajevu i Mostaru.



Učenička promocija „Klasovih“ proizvoda uz poruku „Kupujmo domaće“

Dogovor kuću održava

Uspješan sastanak predstavnika stanara stambenih objekata sa Upraviteljom zgrada i sa Službom za stambeno-komunalnu djelatnost

S ciljem unapređenja međusobnih odnosa, ali i dogovora oko preduzimanja zajedničkih aktivnosti na uređenju izgleda naše sredine, u sali Općinske vijećnice 14. maja je održan sastanak između predstavnika stanara stambenih objekata, preduzeća „Komunalno“ kao upravitelja zgrada i uposlenika općinske Službe za stambeno-komunalnu djelatnost.

Učesnici su iznijeli niz problema iz svakodnevnice, koji se najviše odnose na probleme sa tekućim održavanjem zgrada. Pojedini predstavnici su imali primjedbe na visoku cijenu za održavanje dimnjaka, dok je većina

stanara nezadovoljna održavanjem stubišta i zajedničkih prostorija.

Stanari su također istakli da je neophodno riješiti imovinsko-pravne odnose u određivanju precizne površine zgrada, da se odredi glavni pristup zgradama i da se odrede svrhe i granice nedefinisanih površina, kako bi se jasno znalo koja je to površina koja služi za redovnu upotrebu zgrade.

Predstavnik „Komunalnog“ pozdravio je uspješnu saradnju i korektan odnos sa stanarima i općinskim službama, ali je i apelirao na sve stanare, da savjesno i redovito uplaćuju sredstva na ime naknade za održavanje zgrada. „Ukoliko svi stanari ne plaćaju redovito naknadu, veći investicioni pothvati neće moći biti izvedeni u dogledno vrijeme.“

Na sastanku je bilo govora i o uređenju fasada i sanaciji krovništva zgrada, kako bi se unaprijedio izgled naše životne sredine i otklonio problem prokišnjavanja, posebno u centru grada.

Predstavnici Općine su informisali, da su u budžetu planirana određena sredstva za sufinansiranje ovog projekta, a finansijska konstrukcija će biti uskoro završena i predstavljena stanarima.

Jednoglasno su prihvaćeni slijedeći zaključci:

- Upravitelj će razmotriti mogućnost da primi u radni odnos dimnjačara i čistačicu, kako bi se smanjili troškovi koji nastaju angažovanjem ovih lica putem ugovora

- Zadužuju se Općinski načelnik i Upravitelj zgrada, da iznađu efikasan način finansiranja sanacije krovništva i uređenja fasada stambenih objekata

- Predstavnici stanara će do kraja mjeseca, u suradnji sa etažnim stanarima, izraditi planove investicionog i tekućeg održavanja zgrada, koje će dostaviti Upravitelju, a Upravitelj se zadužuje da napravi presjek stanja u svakoj zgradi ponaosob.



Dogovor o održavanju zgrada...

Radionica-učionica-igraonica...

Nepunu godinu po otvaranju Edukativnog centra UNICEF-a u gradskom Domu kulture zaključeno je, na sastanku održanom 17. maja, da se uspješno ostvaruju dva važna zadatka: djeca su zadovoljna nakon svake radionice, a lokalna zajednica pruža punu podršku Centru! Sastanku je prisustvovala i Dženana Šabić Hamidović, savjetnica u UNICEF-u za pitanja socijalne zaštite i inkluzije (uključivanja).

Koordinatorica aktivnosti Edukativnog centra, Bobana Velaga, upoznala je prisutne na početku sastanka sa aktivnostima koje su provedene proteklih

devet mjeseci. Nakon toga su Mirza Tešnjak, Senad Husetić, Mirsena Gudžević, Milica Kecman i Mirela Tešnjak, edukatori, predstavili svoja iskustva sa radionica.

Razgovaralo se i o efektivnijem djelovanju Centra, pri čemu je naglašeno da mlade treba radom uvjeriti, da oni mogu u svom radioničkom prostoru provoditi i ostvarivati sve svoje aktivnosti i ideje.

UNICEF ima ovakve centre u brojnim gradovima u BiH. Otvara ih, oprema potrebnim radnim sredstvima i organizuje aktivnosti za djecu i mlade školskog uzrasta za razvoj kreativnih sposobnosti, u sklopu

projekta „Podrška trajnim rješenjima za provođenje Revidirane strategije Aneksa VII Dejtonskog sporazuma“.

U aktivnosti Centra, uz podršku UNICEF-a i Općine, uključeni su OŠ „Ahmet Hromadžić“, MŠC „Bosanski Petrovac“, Dom zdravlja, Policijska stanica, Crveni krst, kao i općinski Centar za kulturu i obrazovanje. Na sljedećem sastanku, za sredinom juna, biće predstavljena nova metodologija rada, pomoću koje će učenici sami, bez odraslih, moći ispunjavati svoje aktivnosti i raditi na svojim idejama.



Nastavnici sa predstavnicom UNICEF-a

U Cazinu, 16-27. maja

Uspješna obuka vatrogasaca USK

U Cazinu je od 16. do 27. maja održana obuka za profesionalne i dobrovoljne vatrogasce iz Unsko-Sanskog kantona, među kojima su bila i dva vatrogasca iz Vatrogasne službe naše Općine. Projekt se realiziran u okviru saradnje Vatrogasne jedinice Cazin i Internacionalne vatrogasne asocijacije IFRA iz Škotske.

Od ove Asocijacije su i ranijih godina vatrogasne službe u Kantonu dobijale najkvalitetnija vatrogasna odijela, a sad evo i kvalitetnu obuku. Na treningu za vatrogasce, učesnici su imali priliku raditi vježbe koje podrazumijevaju različite tehnike u slučajevima požara, ali i situacijama prometne nesreće, te obuku za slučajevne hemijske nesreće.



Pokazna vježba u slučaju požara u prometnoj nesreći

Podmladak „Mladosti“ ima priliku – iduće godine!

U Bihaću je 14. maja održan nogometni turnir omladinskih ekipa godišta 2005-06. i 2008-09, na kojem su pored 30 ekipa učestvovala i dvije ekipe petrovačke NK „Mladosti“. Naakon tri utakmice, naši omladinci nisu uspjeli skupiti dovoljno bodova za odlazak u polufinale.

Naša najmlađa ekipa je primila gol u posljednjoj minuti od ekipe iz Cazina, nakon očitog igranja rukom protivničkog igrača, na šta sudija nije reagovao?!

Strijelci za „stariju“ ekipu „Mladosti“ bili su Amer Hidić, a za mlađu Haris Hrkić.

Nakon završenog turnira, naša Općina je priredila ručak svojim mladim predstavnicima, u restoranu „Bingo“, u Bihaću.

Za prevoz su se pobrinuli roditelji, koji su vlastitim vozilima vozili djecu na turnir: Fikret Didović, Ermin Hidić, Mehmed Hrkić, Nerma Hujić, Ansel Husetić, Jelena Kecman i Azra Terzić.



Naši najmlađi nogometaši sa svojim roditeljima na turniru u Bihaću

Da li ste znali da je...

- na inicijativu mnogobrojnih ljubitelja šaha u Bosanskom Petrovcu, 1982. godine osnovan Šahovski klub „Mladost“.
- bosanskopetrovačka Narodna biblioteka imala 1.117 učlanjenih čitalaca i da je te iste 1982. godine izdala na čitanje oko 35.000 knjiga.
- na bogatom nalazištu boksita u Smoljani prvi put 1963. godine počelo iskopavanje rude. Rudu su kopali Krupljani, te su je prodavali Slovencima.
- na području naše Općine 1983. godine otkupljeno oko 1.100.000 l mlijeka za potrebe bihačke mljekare. I te godine najuspješniji proizvođači mlijeka su bili Miroslav Budimir (proizveo je 17.500 litara), Mahmut Husetić (12.000 l), Milena i Mićo Zorić (12.000 l).
- na bosanskopetrovačkim oraničnim površinama zasijano je 1983. godine 6.799,8 hektara.
- Bosanskom Petrovcu 1984. godine pripala čast da se nađe među 90 jugoslovenskih gradova čije ulice je osvjetljavao olimpijski plamen.
- Vesna Jeličić prva Petrovačanka koja je dobrovoljna služila vojni rok.
- Milenko Mišo Marić bosanskohercegovački pjesnik, rođen u Bosanskom Petrovcu, dobitnik više društvenih nagrada i priznanja među kojim: „Zlatna značka“ RK SSO BiH, „Zlatna plaketa Dana mladosti“ SK SSO SFRJ, „Plaketa Bosanskog Petrovca“, „14. februarska nagrada Mostara“, nagrada „Hasan Kikić“, Plaketa „UNTAT“ Ujedinjenih nacija...
- Husein Hujić, rođen u Bosanskom Petrovcu, sadašnji generalni direktor Svjetske federacije inovatorskih organizacija.



Dani kulture, u Bosanskom Petrovcu 80-tih godina, (s lijeva na desno: Ahmet Hromadžić, Branko Čopić, Đuro Pucar, Skender Kulenović i Gustav Krklec)

Slušajte Radio Bosanski Petrovac od 15:00-17:00, svakim danom na 90.9 MHz fm

Važni brojevi u Općini Bosanski Petrovac

Policija	122
Hitna pomoć	124 ; 883-687
Vatrogasci	123
OPĆINA BOSANSKI PETROVAC	883-570